

Barúwa ya Paúli kwa Filemóoni Mulongooryo

Barúwa iyi yaandikwa ni Paúli. Muuntú ^aandikirwa barúwa iyi ni Filemóoni (1:1, 19, 21). Vamanyi va Masáare ^Yari Mpeho vaséaa kuuntú Filemóoni ^iikaláa, ni múuji wa Kolosáai (Vakolosáai 4:9). Kei, uhu Filemóoni ni musúngaati ajáa na ajáa atúite vatúmwa. Yeeye ajáa amuruma Yéesu na ni kaayii kwaachwe noo kuuntú vaantú ^vamura Yéesu ^valumaniráa (1:2). Paúli na Filemóoni vajáa viimányire vyabooha (1:7, 22).

Paúli aandika barúwa iyi mpiindi ^ajáa achu-ungwa uko Róoma kati ya myaaka ya 61-62 keende Kirisitu ^avyaalwa. Paúli aandika barúwa iyi sa mutúmwa wa Filemóoni ^mweene akemerwáa Onésimo. Uhu mutúmwa ajáa amutíja Filemóoni (1:18). Uko Róoma ajáa alumana na Paúli, na Paúli akamuvariyurira Masáare Maaja ya Yéesu Kirisitu, ne akamvarindukira Yéesu (1:10).

Mpiindi jira, kooni mutúmwa ajáa amutíjire mweenenyuumba waachwe na akwáatirwe ni lamurirwa alamurirwáa uulawe. Haaha Onésimo asaakáa ahinduke na kwa Filemóoni mweenenyuumba waachwe. Paúli akoona amwaandikire barúwa sa adome noyo. Paúli amuloomba Filemóoni amuhokere Onésimo ja mwaanaavo kwa Kirisitu (1:16).

Lumbi ya Paúli kwa Filemóoni

¹ Baráwa iyi yafúmire kuri nini Paúli ^nachuungwa sa Kirisitu Yéesu, na Timotéeo mwaaniitu. Tookwaandikira weewe Filemóoni, matumami mwiiwiiswi, ^takweenda,

² na irumbi riitu Afia na Arikipo, manyaampala mwiiwiiswi. Kei tookaandikira mpuka ya vaantu ^vamura Yéesu ^veene valumanaa kaayii kwaako.

³ Nduwo na mwiikalo muija fuma kwa Mulungu Taata wiitu na kwa Yéesu Kirisitu Mweenevyoosi wiitu, jive na nyuuny.

Kweenda kwa Filemóoni na Kumuruma Mulungu

⁴ Kira siiku kati ^noomaloomba Mulungu, nakukambukira na namadumbaa Mulungu sa weewe.

⁵ Ni bweyya niise jei, sa nateera mbuwo ja viintu ^umuruma Mweenevyoosi Yéesu na ^vyeene veenda vaantu voosi va Mulungu.

⁶ Nooloomba kuruma kwaako kwe kiintu kimwi na kuruma kwa vaantu viingi sa utaange kuki-imana kwa masáare yoosi ^yabooha ^meene tapata kwa Kirisitu.

⁷ Mwanawiiitu, kweenda kwaako kwaanjeriirye matima, na kwaampire matima kamwi, sa wavoon'ya mwerere vaantu va Mulungu.

Paúli Yooloomba sa Onésimo

⁸ Sa jei, baa neembe ndiri na luviro kwa Kirisitu lo kulairiya utumame ^vyeene vyoosaakwa,

⁹ maa kaa, nini nime ni viija nikuloombe ko kiiyenda. Nabweyyiirye jei baa neembe nini ni moosi Paúli ^nachuungwa sa Kirisitu Yéesu.

¹⁰ Aai nookuloomba sa mwaana waani Onésimo. Uhu, kunu kuntu ^nachuungwa, namuvariyurira Masáare Maaja ne aava mwaana waani ko muruma Yéesu.

¹¹ Aho ncholo Onésimo* ajáa asiina kunáálo kwaako tuku, maa kaa, haaha, avíre na kunáálo kwaani baa na kwaako.

¹² Baa neembe namweendamweenda, ni kumuhindula niise na kwaako.

¹³ Kwaani naakeenda ngaari achaale na niini aha, sa aantumamire kipaango chaako mpiindi niini ^nkaari neékirwe nyuumbii sa Masáare Maaja.

¹⁴ Maa kaa, kisiina ngaari ^nabwéeyiirye tuku bila weewe kumdekera mbweeyye jeyyo. Kooni woosaaka kunyambirirya, nyambirirya ja ^vyeene weewe uri keenda, maa kaa, kusive kwa njira yo kudoomererya tuku.

¹⁵ Ifaanaa ikava Onésimo akerwa na weewe kwa mpiindi kiduudi sa ahinduke na kwaako, wiikale ne siku joosi.

¹⁶ Haaha, Onésimo si mutúmwá vii tuku, maa kaa, yeeye ni mwaaniitu kwa Kirisitu na tamweenda. Niini namweenda maatuku vii, maa kaa, weewe mweenda uri kulookya ja mutumami waako, kei ja mwaanaanyu kwa Mweenevyoosi.

¹⁷ Sa jeyyo, kooni wookumbiika ja mwiiwaako ^tutúmanaman'yaa, muhokere ja ngaari ^vyeene wummpókiire niini mweeneevyo.

¹⁸ Kooni baa ahon'ya kimwi, au baa kooni ari na noongwa yaako, ndaayya niini.

* **1:11 Onésimo:** Ni isáare ra Kigiríki, noo kusea muntu ^ari na kunáálo.

Rangi

Rangi Translation Project (New Testament)

copyright © 2023 Wycliffe Bible Translators, Inc.

Language: Rangi

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 7 May 2025 from source files dated 8 May 2025

f1dc5da6-bc39-5ea5-ac13-942132b5feb6